

≡ ҮЙЛ ЯВДАЛ ≡

“МОНГОЛ ХЭЛ ШИНЖЛЭЛ”

сэдэвт магистрант, докторантын эрдэм шинжилгээний хурал болов

Монгол Улсын Их Сургуулийн ууган тэнхимийн нэг Монгол хэл, хэлшинжлэлийн тэнхимийн 75 жилийн ой энэ өдөр тохиож байна. Тус ойг тэмдэглэн өнгөрүүлэх ажлын хүрээнд Монгол хэл, хэлшинжлэлийн тэнхим байгуулагдсаны 75 жилийн ой, Академич Ш.Лувсанванданы мэндэлсний 110 жилийн ойд зориулсан "Хэл шинжлэл" хөтөлбөрийн магистрант, докторантуудын эрдэм шинжилгээний хурлыг 2020 оны 12-р сарын 4-ний өдөр цахим хэлбэрээр зохион байгууллаа.

Хуралд тус тэнхимийн докторант Ё.Мөнхбат “Монголын нууц товчоон” дахь *‘qarmaldusu’* хэмээх үгийн утгыг нягтлах нь (манжс-түнгүс хэлний баримтаар),

докторант Чой Юүн Со “*Орчин цагийн монгол хэлний хэв нь дагавар уу, нөхцөл үү?*”, докторант Н.Оюундарь “*Өгүүлбэрзүйн задлуур программд зориулан монгол хэлний өгүүлбэрийн бүтцийг тэмдэглэх нь*”, докторант М.Билгүүнчимэг “*Жангарын туулийн хэлэнд холбогдох судалгааны тойм*”, докторант Х.Бямбажав “*Галдан бошоот хааны тамганы бичээсийг дахин уншиж тодруулах нь*”, магистрант Б.Бадамханд “*Монгол хэлний зүйл хуваасан толь бичгийн бүтцийн тухай*” сэдвээр тус тус илтгэл хэлэлцүүлснээс докторант Ё.Мөнхбат тэргүүн байр, Х.Бямбажав дэд байр эзэлж дурсгалын зүйлээр шагнуулав.

* * *

“МОНГОЛЫН НУУЦ ТОВЧООНЫ 780 ЖИЛ” болон “МОНГОЛ БИЧГИЙН СУРАХ БИЧИГ” үзэсгэлэн гарав

Монгол Улсын Их Сургуулийн Номын сангийн “Ховор ном, монгол бичгийн уншлагын танхим”-ын нээлтийн үеэр Монгол хэл, хэлшинжлэлийн тэнхимээс Монголын Нууц Товчооны 780 жилийн ойд зориулсан бүтээлүүд болон Монгол бичгийн сурах бичгүүдийг дэлгэн үзүүлэв.


Монголын Нууц Товчооны 780 жилийн ойн үзэсгэлэнд Монгол хэл, хэлшинжлэлийн тэнхимийн эрдэмтэн Ц.Дамдинсүрэнгийн 1947 онд хэвлүүлсэн бүтээлээс эхлээд эрдэмтэн Т.Дашцэдэн (1985) эрдэмтэн Ш.Чоймаа (2006, 2011) нарын бүтээл, мөн дэлхийн монгол судлаачдын бүтээлийн дээжээс 50 гаруйг сонирхуулсан байна.

Монгол бичгийн сурах бичгийн бүтээлийн үзэсгэлэнд тус тэнхимийн ахмад эрдэмтэн Б.Ринчен, Д.Чойжилсүрэн, Х.Далхжав, Чой.Лувсанжав, Ц.Шархүү, Т.Дашцэдэн, Ш.Чоймаа, Ц.Шагдарсүрэн, Г.Гантогтох нарын бүтээлээс гадна тэнхимдээ одоо ажиллаж буй багш М.Баярсайхан, Ч.Багтулга, Б.Баяртуул, Б.Даваасүрэн, О.Дэмчигмаа, Т.Отгонтуул, Э.Мөнх-Учрал, Б.Энхсүвд нарын монгол бичгээ шимтэн суралцагч нарт зориулсан ном, сурах бичиг, дүрмийн лавлах, толь бичгүүдийг дэлгэн харуулснаараа онцлог байв.

* * *

“МОНГОЛ-СОЛОНГОСЫН ДИПЛОМАТ ХАРИЛЦААНЫ 30 ЖИЛ:
ХЭЛ, СОЁЛЫН ХАРИЛЦАА” сэдэвт олон улсын эрдэм шинжилгээний хурал болов

МУИС-ийн Шинжлэх Ухааны Сургуулийн Хүмүүнлэгийн ухааны салбарын Монгол хэл, хэлшинжлэлийн тэнхим болон Бүгд Найрамдах Солонгос Улсын Солонгос Судлалын Академитай хамтран зохион байгуулсан “Монгол-Солонгосын дипломат харилцааны 30 жил: Хэл, соёлын харилцаа” сэдэвт олон улсын эрдэм шинжилгээний хуралд Монгол, БНСУ, ОХУ, БНХАУ, Герман, Унгар, АНУ зэрэг орны эрдэмтэн судлаачид, ахисан түвшний суралцагчид 2020 оны 11 дүгээр сарын 27-ний өдөр хоёр орны хэл, соёлд холбогдох долоон салбар хуралдаанд цахимаар оролцлоо. Тус хуралд



Солонгос, монгол судлалын сэдвүүд: Хятад сурвалж дээр тулгуурлах нь
Бүтэц хэлшинжлэл: Авиазүй ба бүтээврийн судалгаа
Хэлний сэтгэцийн судалгаа: Солонгос-монгол хэлний харьцуулал
Боловсрол болон соёлын асуудлууд
Уламжлалт соёлын судалгаа
Утга зохиол судлал
Сурвалж судлал

гэсэн сэдвийн хүрээнд 17 илтгэл хэлэлцүүлж, илтгэл тус бүрд холбогдох асуудлаар асуулт хариулт, санал шүүмж бүхий хэлэлцүүлэг өрнөлөө. Хурлын дараагаар илтгэлүүдийг эмхэтгэн Language and cultural exchange цувралын эхний дугаарт хэвлэн нийтлэв.